



Орган Лемковского Союза  
ЉEMKO, organ Łemkowskiego Sojuza

Пренумерата в краю:  
30 грошей місячно,  
80 „ квартално,  
1.50 „ полрочно,  
3 зл. рочно.  
В Америці: 1 дол. рочно.  
В Чехословакии:  
2 кор. місячно, 10 кор. полрочно,  
20 кор. рочно.  
Ціны оголошень:  
Ціла сторона 120 зл., 1/2 сторо-  
ны 60 зл., 1/4 стороны 35 зл.,  
1/8 стор. 20 зл., 1/16 стор. 10 зл.;  
оголошення малы за 1 мм. 20 гр.,  
в тексті 30 гр., перед текстом  
40 гр. При місячном и долшом  
оголошеню значна знижка.  
Контото чекове №. 404.155.

Выходит в каждый четверг.

Wychodzi w każdy czwartek.

Редакция и администрация в Крынице. — Адрес „Лемко“ Крыница.  
Redakcja i administracja w Krynicy. — Adres „Łemko“ Krynica.

Гитлер зажадал звороту колонии.

Дня 30. січня т. р. минуло 6 літ от часу, коли партия Гитлера (народово-соціалістична) обняла ряды в Німеччині. В том дні канцлер Гитлер выголосил перешло 2-годинну промову, в котрой рішительно зажадал звороту зрабованых „Німеччині колоний“.

В своєї промові Гитлер подчеркнул, же богатства світа будут ділены або силом, але втотчас поділ тот буде змінаний от часу до часу знова силом — або поділит ся богатства світовы на основі справедливости и розуму. Гитлер навел всілякы аргументы на користь колонийных претензии Німеччини и заявил:

— „Бореме ся о наше существованє, а инши о удержанє несправедливости, котра им в додатку нич не приносить“.

Также рішительно выпали слова Гитлера о солидарности Німеччині и Италији

— Если бы война — заявил Гитлер — безразлично с якої причини, была нашмарена Италији, Німеччина стане все по строні своего приятеля.

Под конец своєї промовы Гитлер атаковал католицкый костел и жидов.

Торговельный договор Німеччини с Совітами.

В перших днях лютого выїхал до Москвы начальник департамента торговельного німецького министерства заграничных справ, Шнурер. Має он навязати в Москві розговори с представителями комисарията заграничної торговлі и приготовить грунт для урядовой німецькой делегации в ціли заключеня нового торговельного договора німецько-совітского, подобного до тых, якы вязали Совіты и Німеччину перед ером Гитлера.

Гдеякы круги подавали вісти, же до делегации торговельной буде доданий также политичный делегат німецький, штобы заключити с Совітами также политичны договоры, але со стороны німецькой вістям тым заперчено официально. Францускы промышловы круги не вірят, штобы договоры торговельны меже Німеччином и Совітами могли дати конкретны результаты, а то по той простой причині, же Німеччина наставила свой промысл на приготовленє воєных материялов в такой степени, же не буде мочи выполнити ниякых замовлень совітских. Тот последний аргумент промовлял бы знова за тым, же не о самой торговлі буде говорити в Москві німецка делегация.

Як оціняють промову Гитлера.

Промову Гитлера оціняють яко уміренну. Не было в ней того тупету, той воинственности, яка характеризовала его давнійши промовы. В его жаданях колонийных не было угроз, же Німеччина отбере их силом, а лем домаганє ся их в дорозі дыпломатычных переговоров. Гдеякы газеты приписуют уміренний тон бесіды Гитлера тому, же Англия и Франция вооружают ся и же до них прилучила ся Америка

Газеты польскы приняли с некрытым вдоволенєм слова Гитлера „о добрых отношениях с Польшом, котры очистили атмосферу и загарантовали мир на Выході Европы“.

Также во Франции оціняють промову Гитлера користно. Политичны круги видят в том результат заключеного недавно договора меже министрами заграничных справ обох держав. Користне враженє выкликал также факт, же Гитлер хоче справу колонийных жадань полагодити в дорозі дыпломатычной. Навіт заявленє Гитлера о том, же Німеччина в разі войны стане твердо по строні Италији, не здивовало французских политиков. В звязи с тым газеты французскы подають, же Франция николи не противила ся урегульовати жаданя италиянски и німецькы

на дорозі дыпломатычных переговоров и тепер годит ся также вести переговоры на тему пристяни Джибутти и желізной дорозы: Джибутти-Аддис Абеба, всли лем Италия со своєї стороны згодит ся признати теперешну границу в Тунисі.

Лем в Англия выказуют газеты счудованє по поводу заявленя Гитлера о тісном воєном союзи Німеччини с Италиом. В справі колонии газеты англицкы пишут и так и иначе. Пишут, же Англия на основі мирного договора не забрала колонии на власность, а лем рядит нима и тепер сама може уважати, чи Німеччина ест уж на тилько сильна, што утримат в колониях лад и порядок, чи не даст она собі раду с автохтонным населенєм колоний. В першом разі треба Німеччині колонии отдати, в другом случаю — ні. Так то на двое баба ворожила, Англия ани не понаглядят ся отдати колонии, ани тыж не гварит, же не отдаст.

Англицкы политичны круги числят ся также с тым, же и Польша зголосит свои колонийны претензии и же справа тотта была обговорена в часі побыта министра Бека в Берхтесгаден.

На весну мают „ділити світ на ново“.

Англицкы политичны круги сут переконаны, же на весну прийде до скликаня меженародной конференцији, на котрой будут обговорены слідуючи справы:

- 1) Новый поділ колоний
- 2) Урегульованє форм торговельной выміны
- 3) Терены емиграциинны
- 4) Справа жидовска
- 5) Ограниченє вооруженя.

Конференцию попередят наряды німецько-италиянскы в ціли передыскутованя и устанєня жадань Німеччини и Италији,





